



FAAMASINOGA MUAMUA O FANUA MA SUAFA

LC 12641/P1

Mataupu;- E uiga i le fuaina o le Tuaoi o Afega ma Levi

Saleimoa.

Itu Tagi;-

Maulolo Tavita Amosa, Ututaaloga Charlie Ulia, Pualau Nofoa, Matua Toalua, Fata Simone, Vaitimu Galuafi, Leatuafi Elia, Taliao Saua, Setali Sa, Tautai Iakopo, Fata Pelite, Fata Faiupu, Leatuafi Fuauli, Leu Tavita, Leu Talivai, Ulufale Foalo, Mataafa Iona, Fata Loia, Vaotuuua Iosefa, Taliaoa Fofoga, Fata Tolutasi, Taliao Viliamu, Manuavai'a Vo'i, *mo Alii ma Faipule o Afega, (LC 12641).*

Itu Tetee:

Faavae Lolesio Leaana, Muagututia Reupena, Lefue Perenise, Savea Tuvaelua, Lupeto Faumuina Sevesi, Tulatofia Eteuati, Toeava Leone, Tanoa Muaau, Muaiava Samuelu, Futialo Solaua, Faavae F Leinafo Kolio, Lelei Sio, Niu Falaniko, Tula Kitona, Mauga Sasae Sapa'u, Sausi Iosefa, *mo Alii ma Faipule o Levi Saleimoa (LC 12641 P1).*

Laulau;-

Tiatia Faleupolu Tevita
Masoe Tovia Tufuga
Faumuina Le-Tupufia Oeti Soanai.
Feagaimaalii Malaeliua Sua
Tuilagi Saipele Esera

Suesuega;-

Aso Lulu 02 Aokuso 2023

Faaiuga;-

Aso Faraile 15 Setema 2023



FAAMASINOGA MUAMUA O FANUA MA SUAFA

Fa'atomuaga;-

1. E lua (2) talosaga na o'o mai ai lenei mataupu i le Fa'amasinoga. O le Talosaga LC 12641 na fa'asalalauina i le Savali o le aso 28 o Novema 2020, sa fa'auluina e Fata Vaafai Tolutasi ma Taliaoa Viliamu e fai ma sui o Alii ma Faipule o Afega, o lo'o tatalo mai i le Fa'amasinoga mo se Poloa'iga e fuaina ai le Tuaoi o Afega ma Levi e tusa ma le fa'aiuga o le LC 2253 aso 01 Me 1963. (Faaiuga 1963)
2. Ae o le talosaga LC 12641 P1 na fa'asalalauina i le aso 28 Mati 2022 sa fa'auluina e Fa'avae Lolesio Leaana ma isi mo Alii ma Faipule o Levi o lo'o tatalo mai, ia fa'amaonia le te'ena ma le taofia o le fa'ataunu'uina o le fuaina o le Tuaoi o Afega ma Levi Saleimoa.
3. O lenei mataupu sa i luma o le Fa'amasinoga i le aso 01 Me 2023 ma tolopoina ai lona su'esu'eina, ae poloaina nu'u nei e lua e fa'ataunu'u le fuaina muamua o le latou tuaoi, pei ona fa'amaonia e le Faaiuga 1963. A manino, o le tulaga lena e tatau ona i ai lenei mataupu.
4. E tusa ai ma le Lipoti a le sui Resitara sa auai atu i lea galuega, sa fa'ataunu'uina lava le fuataga i le aso 05 Iulai 2023 mo le fa (4) aso, ae lei auai atu Alii ma Faipule o Levi, ae na o le afioaga o Afega, le sui o le MNRE, Malu o le Malo ma le Fuafanua a Afega na filifilia lava e Afega e tusa o le Poloa'iga.
5. Sa fa'asilasila le laulau a le Fa'amasinoga o le a gafa ma le su'esu'eina o lenei mataupu, ma e leai se Fa'amasino na te'ena
6. O lenei Fa'aiuga o le finagalo autasi o le laulau a le Fa'amasinoga ina ua mae'a ai le latou lloiloga o lenei mataupu, ma sa tu'u fa'atasia ma fofogaina e le Peresetene Lagolago ia Tiatia Faleupolu Tevita.

Talaaga;

7. O le finagalo o le laulau a le Fa'amasinoga i le aso 01 Me 2023 e fa'apea;-
 1. E lua talosaga mo le mataupu.



FAAMASINOGA MUAMUA O FANUA MA SUAFA

(i) Alii ma Faipule o Afega;- la fuaina loa le tuaoi o Afega ma Levi ina ia tusa o le faaiuga LC 2253 – 1963

(ii). Alii ma Faipule o Levi Saleimoa – la teena le fuaina o tuaoi o Levi ma Afega.

2. O le silasila a le laulau a le Fa'amasinoga (01 Me 2023) o lea ua manino le tuaoi o afio'aga e lua (2) Levi ma Afega pei ona faaalua i le LC 2253 – 1963 i lona fuaiupu 3 e faapea;-- *“O le tuaoi i le va o Eleele o Afega ma le eleele o Levi e amata i le pito i Saute Sisifo o le 723 Eka lea na tuuina atu e le Malō i tagata Leauvaa i le tausaga 1911, ma fa'aauau ai lava i le itu i Saute i se laina sao i se ala puupuu seia tau i eleele tau papalagi”*
3. E manatu la le laulau, e tatau ona se'i fa'ataunu'u le fuaina muamua o le tuaoi (1963), a manino, o le tulaga lenā e tatau ona i ai lenei mataupu. E leai se tulaga e tatau ai se isi su'esu'ega auā o mau na fa'avae ai le fa'aiuga 1963 o mau foi na o le a toe finauina.
4. Ua mae'a ona toe apiliina lea fa'aiuga LC 2253 (aso 30/9/1963) ma na te'ena le apili.
5. Ua tolopo ai le su'esu'eina o lenei mataupu ae ua tu'uina atu le avanoa i itu fa'amasinoga uma e lua (2) Levi ma Afega ina ia fa'ataunu'uina loa le fuataga
6. E tofu nu'u e lua ma le fuafanua, ma ua poloaina le aso 14 Iuni 2023 e fa'ataunu'u ai le fuataga ona toe vala'au ai lea o le Fa'amasinoga i le aso 02 Aokuso 2023 (9.30) i le taeao).
7. Toe fa'atulaga le mataupu lenei mo le aso Lulu 02 Aokuso 2023



FAAMASINOGA MUAMUA O FANUA MA SUAFA

8. Na tusi talosaga mai Fa'avae Lolesio Leaana i le aso 9/5/2023 e talosagaina le Afioga i le Peresetene mo sana Poloaiga e fa'aleaogāina ai le Poloa'iga a le Fa'amasinoga Muamua aso 01 Me 2023 ina ia toe fuaina le tuaoi o Levi ma Afega i tua atu o le 723 eka na ave mo Leauva'a i le tausaga 1911. Na tu'uina mai le finagalo o le Peresetene e fa'apea;-

1. *E leai se malosiaga i le Peresetene e fa'aleaogaina ai se fa'aiuga a se Fa'amasinoga.*

2. *Na o le Fa'amasinoga Maua'uga e mafai ona soloia, fa'aleaogāina ma suia se fa'aiuga a le Fa'amasinoga Muamua pe a uma ona lilo se talosaga apili*

9. O le ao 13 Iulai na tu'uina mai ai le lipoti o le fuataga a le Afioga o Levi Saleimoa uā mae'a fa'atino le latou fuataga fa'atasi ai ma le latou talosaga mo se fa'amalamalamaaga ma se Fautuaga e uiga i le mataupu o le fuaina o 'ele'ele o Levi Saleimoa ma Afega. Sa tu'uina mai le finagalo o le Afioga i le Peresetene e faapea;

1. *O lea e tusi mai Alii ma Faipule o Levi (13/7/2023), e faapea sa tusi mai i le aso 9/5/2023 e taofi le fuaina o le tuaoi o Levi ma Afega e pei ona poloa'i ai le Fa'amasinoga Muamua*

2. *O lenei mataupu ua mae'a ona fai ai le poloa'iga a le Fa'amasinoga Muamua ma fa'atulaga i le aso e su'esu'e ai*

3. *Ave uma talosaga i le Laulau ua atofaina.*

10. O le aso 27 Fepuari 2023 na fa'atulaga ai le fonotaga Fa'ale-Faamasinoga mo itu o lenei mataupu e tusa ma le Tulafono, peita'i e le'i auai le itu a Alii ma Faipule o Levi, finagalo itu e fa'aauau le Fa'amasinoga i le aso ua atofaina, aso 01 Me 2023.

Autu o le Faigasuega'-

11. la fa'amaonia po'o le fa'aleaogāina o le fuataga o le Tuaoi o Afega ma Levi na fa'amaonia ma fa'amamaluina ma fa'amausalī i le Fa'aiuga a le Fa'amasinoga o



FAAMASINOGA MUAMUA O FANUA MA SUAFA

Talosaga LC 2253 aso 30 Setema 1963, lea na poloaina e le Fa'amasinoga Muamua aso 01 Me 2023 ina ia fuaina lea tuaoi..

Finauga a Itu Fa'amasinoga;-

12. O le finauga a le Itu Tagi, o le Faaiuga 1963 na fa'ataoto mai ai le laina tuaoi i le va o Afega ma Levi, peita'i ua siliga taliiseu se taumafaiga i feiloa'iga i aso ua tuana'i e maua ai se agaga o le galulue fa'atasi o Afega ma Levi i le fuaina o le TUAOI o Afega ma Levi.
13. O le atugaluga o Alii ma Faipule o Afega, ua i ai nisi o aiga Levi e pei o Lupetō Sevesi e talitonu Afega o loo latou nofoia ia eleele tau Afega, ma ua amata ona tutupu mai ai le vesiga i le va o Afega ma ia aiga ae maise lava le aiga o Lupetō Sevesi. O lea foi ua tolopo mai e le Faamasinoga le faataunuuina o le talosaga a Afega e faatulaiese Lupetō Sevesi seia muamua ona tagofia le Faamasinoga o le fuaina o le Tuaoi o Afega ma Levi..
14. Ua manatu ai Afega, e pau lava le auala e foia ai nei fe'ese'esea'iga uma o le fua loa o le Tuaoi o Afega ma Levi e pei ona fai i ai le Faaiuga LC 2253, 1963.
15. O loo aumai e Afega malosiaga faale-Tulafono e lagolago ai le latou finauga e pei ona i ai le Faaiuga LC 2253 aso 01 Me 1963 o loo faapea mai le vaega 3 o lea Faaiuga;- O le tuaoi i le va o 'ele'ele o Afega ma le 'ele'ele o Levi e amata i le pito i Saute Sisisfo o le 723 eka na tu'uina atu e le Malō i tagata Leauva'a i le tausaga 1911, ma fa'aauau ai lava i le itu i Saute i se laina sa'o i se ala pu'upu'u seia tau i 'ele'ele tau palagi. O le vaega 4 o lea lava Fa'aiuga 1963;- O le 'ele'ele i le itu i Sasa'e o lea tuaoi ua fa'aalia nei, e fa'apea o 'ele'ele ia o Afega, ma o le 'ele'ele i le itu i Sisifo o 'ele'ele tau Levi.
16. O le aso 30 Setema 1963 na te'ena ai e le Fa'amasinoga o Talosaga se fa'atagaga e tu'uina atu i le Talosaga a Alii ma Faipule o Tuana'i e toe lloilo ai le fa'aiuga 01 Me 1963, ma na fa'atumauiina lea Fa'aiuga a le Fa'amasinoga o Ulua'i Su'esu'ega, ma ua fa'amamaluina ma fa'amausaliina e tusa ma ala o le Tulafono. E le'i apili Levi, ae lua a latou itu i lea Fa'amasinoga, ma o se fa'aailoga e ta'u mai ai ua latou

[Faaiuga LC.12641/P1: Tuaoi "AFEGA & LEVI SALEIMOA"- 15 Setema 2023]



FAAMASINOGA MUAMUA O FANUA MA SUAFA

lagolagoina le Fa'aiuga 1963.

17. E taofi Alii ma Faipule o Afega, o lea ua maalo ataata o Taulelei i le va o Afega ma Leauva'a ina ua mae'a le tele o fa'amasinoga, ae toe lava o le itu lenei o lo'o totoe ona taoto filemu lava lea o 'ele'ele e fa'asino i nu'u taitasi ma o i tonu o le a taoto filemu ai loa le va o nu'u uma nei.
18. O le finauga a le Itu Tete'e, o le tausaga 1943 na fuaina ai le tuaoi o Afega ma Levi, na fuaina fa'atasi ma le 723 eka lea na ave mo Leauvaa. E fai ane la le Fa'aiuga 1963, ua 20 tausaga talu ona mae'a fuataga nei.
19. O le finagalo o Alii ma Faipule o Levi, o le fuataga lea i le 1943 o lo'o fa'avae ai le latou talitonuga o le tausaga lava lea na fuaina ai le tuaoi o Levi ma Afega, ma o le vaega 3 ma le 4 o le Fa'aiuga 1963, na fa'avae mai i le fuataga lea i le 1943.
20. O loo matua tete'e Alii ma Faipule o Levi i Talosaga na fa'auluina e Alii ma Faipule o Afega e fa'apea e le sa'o, ona o Afega e lua faiganu'u e le o i ai uma Afega i nei talosaga, ma ua 'olegia e nai matai se toatolu le Fa'amasinoga, ma sa le tatau ona taliaina e le Resitara le fa'auluina o nei Talosaga,
21. O lo'o lisi mai foi e le Itu Tete'e fa'aiuga o Fa'amasinoga sa faia i le itu i Saute Sisifo o le laina tuaoi o Afega ma Levi e le'i fa'alavelave ai Afega, ma fa'apea mai o le fa'aailoga lea o fanua o Levi ae le o Afega.

Faatonufoiau;-

22. I le maitau atu i finauga a itu fa'amasinoga, ua le mafaia lava e le va fealoaloa'i fetausia'i faale-aganu'u, ona maua se tali i lenei mataupu. E manatu foi le Fa'amasinoga, ai ona o le mataupu na lagatila le Tulafono e fa'ataoto le Tuaoi o nu'u e lua, Afega ma Levi sa fa'amaonia i le 1963, ma o le Tulafono foi la o lo'o i ai le tali o lenei mataupu
23. Fa'aiuga a le Faamasinoga e fesootai ma lenei mataupu;-




FAAMASINOGA MUAMUA O FANUA MA SUAFA

1. Faaiuga LC 1195 aso 29 Iulai 1952. O le mataupu i le va o Alii ma Faipule o Afega ma Alii ma Faipule o Tuanai (Itu Tagi), e fa'asaga i Alii ma Faipule o Leauva'a (Itu Tetee), e uiga i le 'ele'ele i tua mai o le tuaoi o le 'ele'ele o Leauva'a ua uma ona fuaina e le Malō.

O le 'ele'ele o lo'o finau ai, o le 'ele'ele e i tua o le tuaoi o le 723 eka na tu'uina atu e le Malō ina ia fa'aaogāina e tagata Leauva'a, ae lē o se 'ele'ele o Leauva'a a'o lo'o i ai pea le Pule o Fata ma Maulolo. Ia 'aia nei toe faia ni fa'atoaga fou a tagata o Leauva'a i le fanua o loo finau ai.

O le Itu Tete'e ma tagata o le nu'u o Leauva'a, ia tula'i'ese ma 'aia nei latou toe fa'aaogāina le 'ele'ele o lo'o fa'asino i ai le parakalafa 1 o lenei fa'aiuga ia le silia le aso aso 31 o Tesema 1959, ma e mafai i lea vaitaimi ao le'i o'o i le aso ua tusia nei ona latou ave'ese;-

(a) ni fua o fa'atoaga o lo'o i ai i 'ele'ele ua tataua ona fa'aaogāina ma ave'ese.

(e). so o se fale sa latou fa'atuina i luga o lea 'ele'ele, ae 'aia le tatipi pe Fa'aleaga pe ave'ese ni la'au po o ni mea totō o loo tutupu a'e ai i luga o lea 'ele'ele ma ia 'aia ne'i fa'aleagaina le 'ele'ele i so o se faiga lava.

2. Faaiuga LC 1927. Aso 05 Aperila 1961 i le va o Alii ma Faipule o Afega sa itu fa'atasi ma Tevaga Paletasala ma Salā Sasa o Leauvaa (Itu Tagi), faasaga iā Luafatasaga Kalapu, Luafatasaga S. ma Tialino T. Saena o Tuanai (Itu Tetee).

O vaega o lenei fa'aiuga (Faaiuga 1961) e feso'ota'i ma le mataupu o lo'o su'esu'eina nei;-

Vaega 3 e faapea;- Ua le o taua i le l'uga o le aso 29 Iulai 1952 (Faaiuga 1952) e faapea ua fa'aiuina ai po'o fea nu'u po'o nu'u e o latou fanua uma poo nisi o fanua o loo aafia ai i lea l'uga.



FAAMASINOGA MUAMUA O FANUA MA SUAFA

Vaega 7 e faapea;-- Ua le o taua ma fa'aalia i lenei l'uga poo le fea nu'u po'o nu'u e o latou fanua uma po'o nisi o fanua o lo'o lavea i lenei fa'aiuga; ma afai e le mafai e Alii ma Faipule o nu'u e a'afia i lenei mataupu ona teuteu e i latou lea itu i ni a latou fesilafaiga ona mafai ai lea e Alii ma Faipule o soo se nu'u o lo'o taofi i latou i le pulea o fanua uma po'o nisi o ia fanua ona faia sa latou talosaga i le Fa'amasinoga i so'o se aso pe a te'a le aso 01 o Ianuari 1962 ina ia su'esu'eina lea mataupu. E talitonu, o le ala tula'i lea o le Fa'amasinoga i le 1963.

3. Faaiuga LC 2253 aso 01 Me 1963. I le va o Savea Toso, Maulolo Pauesi, Fata Matua (Alii ma Faipule Afega) le Itu Tagi, faasaga iā 1. Luafatasaga Sue ma isi (Alii ma Faipule o Tuanai, 2. Sapau Sae ma isi (Alii ma Faipule o Levi), 3. Saveaalii loane (Alii ma Faipule o Levi) o Itu Tete'e..

O le mataupu na su'esu'eina;- E uiga i le Pule o eleele uma o loo i tua o le eleele na tuuina iā Lealatele (Leauvaa) e tusa o le 723 eka, atoa ma le tuaoi o eleele tau Afega (Fata ma Maulolo) ma eleele o Levi

(Faaiuga 1963);-

1. O le 'ele'ele o loo finau ai o le 'ele'ele lava lea sa iloiloia i Fa'aiuga a le Fa'amasinoga o le aso 29 Iulai 1952 ma le aso 5 o Aperila 1961 ia ua fa'amaonia nei.
2. O le pule o le 'ele'ele o lo'o finau ai ua i ai lea i Alii ma faipule o Afega i lalo o le Pule fa'amalumalu a Fata ma Maulolo.
3. O le tuaoi i le va o le 'ele'ele o Afega ma le 'ele'ele o Levi, e amata i le pito i Saute Sisifo o le 723 eka lea na tu'uina atu e le Malo i tagata o Leauva'a i le tausaga 1911 ma fa'aauau ai lava i le itu i Saute i se laina sa'o i se ala pu'upu'u seia tau i 'ele'ele tau papalagi
4. O le 'ele'ele i le itu i Sasa'e o lea tuaoi ua fa'aalia nei e fa'apea o le 'ele'ele o Afega; ma o le 'ele'ele i le itu i Sisifo, o 'ele'ele ia tau Levi



FAAMASINOGA MUAMUA O FANUA MA SUAFA

5. E mafai e Alii ma Faipule o Tuana'i ona fa'aauau pea ona latou fa'aaogaina o le 'ele'ele ua finau ai i lalo o le pule e pei ona ta'ua nei

4. Faaiuga Faamasinoga o Talosaga LC 2253 aso 30 Setema 1963

Na toe apili e Alii ma Faipule o Tuana'i le Fa'aiuga 1963 ma na te'ena se fa'atagaga e toe lilo ai le fa'aiuga a le Ulua'i Su'esu'ega aso 01 Me 1963, ma ua tumau ma mausalī ma faamamaluina lea faaiuga (Faaiuga 1963). E le'i toe talosaga Alii ma Faipule o Levi.

Iloiloga;-

24. O le mea ua mautinoa, e le'i faia se fuataga o le Tuaoi o Levi ma Afega e Alii ma Faipule o Levi e pei ona poloaina e le Fa'amasinoga i le aso 01 Me 2023. Ua manino foi le tali mai a le Afioga i le Peresetene i tusi e lua a Alii ma Faipule o Levi - Fa'avae Lolesio Leaana (aso 9 Me 2023 ma le aso 13 Iulai 2023) e te'ena ai le fuataga o le Tuaoi.
25. O lo'o manino le Talosaga a Afega na fa'auluina i le aso 23 Oketopa 2020 mo se Poloaliga a le Fa'amasinoga mo le fuaina o le Tuaoi o Afega ma Levi e tusa ma le Fa'aiuga o le LC 2253, 1963, ma o lea Poloaliga na tu'uina atu i le aso 01 Me 2023 mo le fa'ataunu'uina o le fuataga i le aso 14 Iuni 2023. E ui na tuai ona fa'ataunu'uina lea fuataga, ae na usitaia e Alii ma Faipule o Afega ma fa'ataunu'u i le aso 05 Iulai 2023, ma tu'uina mai lea fuataga i le Fa'amasinoga i le aso 02 Aokuso 2023 lea na atofa e toe vala'auina ai lenei mataupu i luma o le Fa'amasinoga.
26. O le Lipoti o le fuataga a Alii ma Faipule o Levi na tu'uina mai i le aso 13 Iulai 2023, sa fa'apea mai; ua maea ona fa'atino le latou fuataga fa'atasi ai ma le latou talosaga mo se fa'amalamalamaga mo se fautuaga e uiga i le mataupu o le fuaina o Tuaoi o elelee o Levi Saleimoa ma Afega. Na tali le Afioga i le Peresetene, o lenei mataupu ua maea ona fai ai le Poloaliga a le Fa'amasinoga Muamua ma faatulaga le aso e su'esu'e ai.
27. O le Tala tusia a Alii ma Faipule o Levi o lo'o fa'apipii mai tūa le Pepa fa'aopoopo 2 ma fa'apea mai, le ata po'o le fa'afanua o le 723 eka lea na ave mo Leauva'a ma



FAAMASINOGA MUAMUA O FANUA MA SUAFA

ona tuaoi uma i Sasa'e ma Sisifo ma Saute; ma nei ata ma fa'afanua o loo fa'amaonia ma saina e le Alii Fuafanua o Tauvela P. Hunter i le aso 26 Oketopa 1943; ma o loo i ai uma nei faafanua i fa'amaumauga a le malo o loo i le Matagaluega o Punaoa Faalenatura ma le Siosiomaga.

28. O le vaai a le Fa'amasinoga i nei sailiga ma tapenaga a Alii ma Faipule o Levi, ua le o lea le Poloaliga a le Fa'amasinoga pei ona fa'ailoa atu i luga.

Muamua, e le o se Fa'amasinoga poo se fuataga o le 723 eka na ave mo Leauvaa, ae o le faamasinoga i le fuaina o le tuaoi o Afega ma Levi

Lona lua, na manino lava le Poloaliga, ia fua le tuaoi o Afega ma Levi pei ona fa'aalia mai i le LC 2253 - 1963 i lona fuaiupu 3 e fa'apea;- O le tuaoi i le va o 'ele'ele o Afega ma le eleele o Levi e amata i Saute Sisifo o le 723 eka lea na tu'uina atu e le Malō i tagata o Leauva'a i le tausaga e 1911, ma faaauau ai lava i le itu i Saute i se laina sa'o i se ala pu'upu'u seia tau i 'ele'ele tau papalagi.

29. O le ata fa'afanua lea na tuuina mai e Alii ma Faipule o Levi, e le o māua pe se poloaliga a le Faamasinoga na alai ona faia lea fuataga, ae ua manino le Mataupu na suesueina i le 1963, o le pule i eleele uma o loo i tua o le 'ele'ele na tu'uina i Lealatele (Leauvaa) e tusa o le 723 eka, atoa ma le tuaoi o 'ele'ele tau Afega (Fata ma Maulolo, ma 'ele'ele o Levi.

I le vaega 2 o le Faaiuga 1963 o loo faapea mai;-

O le pule o le 'ele'ele o loo finau ai ua i ai lea i Alii ma Faipule o Afega i lalo o le Pule fa'amamalu a Fata ma Maulolo.

Ia manino lelei, o le 'ele'ele e i tua mai o le 723 eka na ave mo Leauva'a, e pei ona manino mai le mataupu sa su'esu'eina i le LC 2253 aso 01 Me 1963, o le 'ele'ele o Fata ma Maulolo poo Afega. O lona uiga, o 'ele'ele uma ma fanua i tua mai o le 723 eka i Sasae, Sisifo, Matu ma Saute, o eleele uma tau Afega ua faamaonia e le Fa'amasinoga, Fa'aiuga 1963.



FAAMASINOGA MUAMUA O FANUA MA SUAFA

30. O lea lava foi na iloa i le Fa'aiuga 1961, e lei manino po'o ai nu'u e onaina nei 'ele'ele e i tua o le 723 eka, na mafua ai ona fai mai le vaega 7 o lenā Faaiuga 1961, a siliga se fa'atofalaiga i Alii ma Faipule o nei nuu e taofi o latou 'ele'ele, ia fa'aulu mai Talosaga i le Fa'amasinoga e su'es'ue ai ma faia i ai se fa'aiuga.
31. O le mafua'aga lea o le Fa'amasinoga LC 2253, 1963. sa Itu Tagi ai Alii ma Faipule o Afega e fa'asaga i Alii ma Faipule o Tuanai ma Alii ma Faipule o Levi. (Itu Tete), sei su'es'ue po'o ai nu'u e onaina nei 'ele'ele. Ua fa'amamaluina ma fa'amausalī le Faaiuga 1963 ina ua tee'na le Apili a Alii ma Faipule o Tuanai auā e lei apili Levi. O le Faaiuga 1963, o le Tulafono, ma o se tasi na te lē usitaia, o le fa'alēmigao lea i le Fa'amasinoga, ma e ono molia mo se fa'asalaga.
32. O le fa'apea mai la o le Itu Tete o le 1943 na fua ai le tuaoi o Levi ma Afega ma iloa ai nu'u ma o latou 'ele'ele e i tua mai o le 723 eka a Leauva'a, e te'ena e le Fa'amasinoga lea finagalo, fa'atoā manino ia 'ele'ele i le Fa'aiuga 1963, o 'ele'ele o Afega o lo'o i tua mai o le 723 eka a Leauva'a, ma na fa'amaonia ai foi ma le Tuaoi o Afega ma Levi i lena lava Fa'amasinoga i le 1963, lea ua talosaga Afega ina ia fuaina.
33. O Fa'amasinoga i fanua o tagata Levi e le'i fa'alavelaveina e Alii ma Faipule o Afega, pei ona ta'ua e le Itu Tete'e, e manatu le Fa'amasinoga ua lava le malosi o le Fa'aiuga 1963 e agava'a ai Alii ma Faipule o Afega e lu'iina ai ia fa'aiuga i le lumana'i pe a finagalo i ai, ma o ala na o le Tulafono.
34. Ua malamalama ma manino le Fa'amasinoga i le lipoti o le fuataga o le Tuaoi o Afega ma Levi sa fa'atautaia e Sepulona Surveying Firm. Ma o le susuga foi i le Fuafanua iā Galuvao S.V. Sepulona na fofogaina le Lipoti i luma o le Fa'amasinoga ina ua mae'a ona fa'atautoina. Ua manino le laina Tuaoi o Afega ma Levi e ala i fa'afanua na tau'a'aoina, ma fa'amatalaga fa'afaigofie e pei ona tali mai le Susuga i le Fuafanua. Sa amataina lava le galuega i le pito i Saute Sisifo o le 723 eka, ona fa'asa'o ai lea i le Bearing 184 degree 20 minute 50 second seia paia le Lotoso'a road. O le bearing na fa'aaogā, o le bearing lava lea o le laina tuaoi o Levi ma Leauvaa e amata mai le aualatele o le Malō (Main Coastal Road). O le umi o le

[Faaiuga LC.12641/P1: Tuaoi "AFEGA & LEVI SALEIMO'A" - 15 Setema 2023]



FAAMASINOGA MUAMUA O FANUA MA SUAFA

laina sa fuaina e 2,297.25 mita..

Mafuaaga o le Fa'aiuga;-

35. Ua fa'amalieina le Fa'amasinoga i le Lipoti o le fuataga o le laina Tuaoi o Afega ma Levi e pei ona Poloaina e le Fa'amasinoga, ma ua talia le Lipoti. O lea laina tuaoi na fa'amaonia e le Fa'aiuga a le Fa'amasinoga LC 2253 aso 01 Me 1963, ma o lea ua mae'a ona fuaina.
36. Ua lē fa'amalieina le Fa'amasinoga i le finauga a le Itu Tete'e, o le fuaina o le 723 eka a Leauva'a na fuaina fa'atasi ai ma le Tuaoi o Afega ma Levi, ma o le latou te'ena foi lea o le Poloaiga na tu'uina atu e le Fa'amasinoga ia fua le Tuaoi pei ona fa'amaonia e le Fa'aiuga a le Fa'amasinoga LC 2253 aso 01 Me 1963..
37. E talia e le Fa'amasinoga le fa'afanua o le 723 eka a Leauva'a na tu'uina mai e Alii ma Faipule o Levi ona o le amataga lea o le laina Tuaoi o Levi ma Afega i le Itu i Saute Sisifo o le 723 eka, ma sa fa'apea foi ona tu'uina mai e le Fuafanua a Alii ma Faipule o Afega lea lava fa'afanua, e tapasaina ai le amataga o le latou fuataga e tusa ma le Fa'aiuga 1963.
38. E talitonu le Fa'amasinoga ua atoa ai nei le faa-Tulafonoina o le Tuaoi o nei nuu e lua, ma ua tatau ona faigofie ona malamalama ma manino le fa'aaogaina o 'ele'ele o Afega ma Levi ma maua le nofo filemu ma le fetausia'i i le lumanai.

Fa'aiuga;-

1. Ua fa'amaonia e le Fa'amasinoga le fuataga o le laina Tuaoi o Afega ma Levi pei ona poloaina e le Fa'amasinoga.
2. Ua poloaina e le Fa'amasinoga Alii ma Faipule o Afega ma Levi ia tausisia lenei Tuaoi ua avea ma Tulafono.



FAAMASINOGA MUAMUA O FANUA MA SUAFA

3. Tupe na faaulu ai talosaga ua avea ma totogi o le Faamasinoga.

Handwritten mark



Signature
Tiatia Faleupolu Tevita
Peresetene Lagolago

Signature
Masoe Tovia Tufuga
Faamasino

Signature
Faumuina Le-Tupufia Opapo Soanai
Faamasino

Signature
Feagaimaalii N. Malaefiua Sua
Faamasino

Signature
Tuilagi Saipele Esera
Faamasino